

# Tupanik nioqqutissat nalunaaqutserneqartarneri nioqqutigineqarnerilu pillugit Inatsisartut peqquussutaannik Namminersorlutik Oqartussat nalunaarutaat

Matumuuna tupanik nioqqutissat nalunaaqutserneqartarneri nioqqutigineqarnerilu pillugit Inatsisartut peqqussutaat nr. 10, 14. november 2004-meersoq, Inatsisartut peqqussutaat nr. 6, 26. maj 2010-meersup malitsigisaanik allannguuteqartoq nalunaarutigineqarpoq.

## *Atuuffia*

§ 1. Peqqussummi pineqarput nioqqutissat tamarmik tupap naasuanit (Nicotianamit) suliarineqarsimasut, tassunga ilanngullugit sikaritsit, sikaat, sikaavaqqat, serutsit, imassat, tupat imusassat, sunoorsit sukuluussallu il.il.

§ 2. (Atorunnaarsinneqarpoq).

§ 3. (Atorunnaarsinneqarpoq).

§ 4. (Atorunnaarsinneqarpoq).

§ 5. (Atorunnaarsinneqarpoq).

§ 6. (Atorunnaarsinneqarpoq).

§ 7. (Atorunnaarsinneqarpoq).

## *Tupanik nioqqutissianik nioqquteqarneq*

§ 8. Inunnut 18-it inorlugit ukiulinnut tupanik nioqqutissianik tuniniaasoqaqqusaanngilaq.

*Imm. 2.* Tupanik nioqqutissianik tuniniaaneq pisiniartitsisumit pisinneqarnikkut taammallaat pisinnaavoq.

*Imm. 3.* Inuk 18-inik ukioqalersimanerminik pisariaqartumik uppersaateqarnerisik nioqquteqartup pisiniafullu tuniniaasup qulakkiissallugu akisussaaffigaat, takuuk imm. 1.

§ 9. Tupanik nioqqutissiat ataasiakkaarlugit nioqqutigineqassanngillat. Tassunga ilaanngilaq sikaanik nioqquteqarneq.

*Tupanik nioqqutissianik nalunaaqutserisuineq*

§ 10. Tupanik atuinerup peqqinnissamut peqqinnermullu navianartumik sunniuttarneranik mianersoqqussummik tupanik nioqqutissiat tamarmik erseqqissumik nalunaaqutserneqarsimassapput. Mianersoqqussut kalaallisut danskisullu allassimassaaq.

*Imm. 2.* Mianersoqqussutit qanoq oqaasertaqartinneqarlutillu iluseqartinneqarnissaat pillugit malittarisassanik Naalakkersuisut aalajangersaassapput.

§ 11. Tupanik nioqqutissiat tamarmik usserummik aamma nikotinimik qanoq annertutigisumik akoqarnerinik paasissutissartaqartinneqassapput. Paasissutissat kalaallisut danskisullu allassimassapput.

*Tupanik nioqqutissiat pilerisaarutigineqarneri*

§ 12. Tupanik nioqqutissiat allagarsiussatigut, allagartarsuartigut allatigulluunnit pilerisaaruteqartoqaqqusaanngilaq.

*Imm. 2.* Tupanik nioqqutissianik pilerisaarutitut sunulluunniit inerteqquteqarneq nalunaaqutserisuutit, saqqarmiut, ilisarnaatit allatulluunniit takussutissiat atornerisigut sanioqqunneqassanngilaq.

*Imm. 3.* Immikkoortoq 1-imi aamma 2-mi inerteqqutitut ilaanngillat aviisit, atuagassiat, aviisit assiliartalersukkat assigisaallu Nunatsinnut eqqunneqartartut.

§ 13. Tupanik misiligitissanik akeqanngitsumik agguaneq inerteqqutaavoq.

*Pineqaatissiisarnerit*

§ 14. § 8-mi, imm. 1 aamma 2-mi, § 9-mi, § 10-mi, imm. 1-imi, § 11-mi, § 12-mi, imm. 1 aamma 2-mi, aamma § 13-imi aalajangersakkanik unioqqutitsinermi akiliisitaasussanngortitsilluni pineqaatissiisoqarsinnaavoq.

*Imm. 2.* Aktiaateqarluni ingerlatseqatigiiffik, piginneqataassuteqarluni ingerlatseqatigiiffik, piginneqatigiiffik taamaaqataalluunniit imm. 1-imi pineqartumik unioqqutitsippat ingerlatseqatigiiffik immini unioqqutitsinermut akiliisitaasussanngorlugu akisussaatinneqarsinnaavoq. Namminersornerullutik Oqartussat, kommuni imaluunniit kommunit ataatsimoorlutik ingerlassaqarfii unioqqutitsisimappata Namminersornerullutik Oqartussat, kommunalbestyrelse imaluunniit kommunit ataatsimoorlutik ingerlassaqarfii taamatut akiliisitaasussanngorlugit akisussaatinneqarsinnaapput.

*Atuutilerfia*

§ 15. Inatsisartut peqqussutaat ulloq 1. januar 2005 atuutilerpoq.

*Imm. 2.* Peqatigitillugu Tupa avatangiisinillu tupatorfunngitsunik isumannaarineq, kiisalu tupanik

nioqqutissat nalunaaqutserneqartarneri pillugit Inatsisartut peqqussutaat nr. 4, 23. maj 2000-imeersoq atorunnaarsinneqarpoq.

*Imm. 3.* Tupamit tunisassiat nioqqutissap suuneranik dansk-isunnarluunniit nalunaarsorneqaraluarpata tuniniarneqarsinnaapput, tak. § 11, tupamit nioqqutissiaq 2005-imi jannuaarip aallaqqaatigitinnagu Nunatsinnut eqqunneqarsimappat.

---

(Tupa avatangiisinillu tupatorfiunngitsunik isumannaarineq kiisalu tupanik nioqqutissat nalunaaqutserneqartarneri pillugit Inatsisartut peqqussutaata allanngortinneqarnera pillugu) Inatsisartut peqqussutaat nr. 6, 26. maj 2010-meersoq <sup>[1]</sup> atortuulersitsinermut aalajangersakkanik tullinnguuttunik imaqarpoq.

## § 2

Inatsisartut peqqussutaat ulloq 1. oktober 2010 atortuulerpoq.

---

*Peqqissutsimut Naalakkersuisoqarfik, ulloq 20. september 2023*

**Nike Berthelsen (atsior.)**  
Naalakkersuisoqarfimmi pisortaq

/ Hans Erik Dahl (atsior.)

<sup>[1]</sup> Inatsimmut allannguut §§ 2-7-mut tunngavoq

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut